

Message Five

Mami Tengah Duemna Aka Pekung Khrih

Caciim tee ham: Gens 1:26, 31 – 2:2; Math 11:28-30; Exod 31:12-17

I. “Thalrit aka phuihthli oen patang aka khangthli boeih, ka tengah law u lah. Duemna kan pe ai. Kai kah phuih he phuih u lang tah ka tengah van cang u lah. Kai tah kawdawna oen dungvoengna la ka awm. Nangmi kah nalungbuithli lawng duemna a dang ai. Metihtiah, ka phuih nep tih ka thalrit zaang a tina” - Math 11:28-30.

- A. He huenah patang khang rui oen bibina tihe tah aana-awl oen bawkna ben kah vaiham koeithli oen aka tuhkai awlpeekthli te khoemdoen hamla patang ruila thahuer bibi saina bueng muehla, meang bibina dawng khawseh taana ham thahoeng ruila bibina tekhawseh a thuinuet. Te dawngah thahoeng ruila bi aka bi meang thlaang khawseh thlarit phuih la awm poepa.
- B. Bawipa lawng Pa te a koehbawkna, Pa kah a lawngim a ming tih dawklawhna oen Pathen kamthlahna a phawng nathli te a sai boeih coeng ah (athan 25-27), Bawipa lawng he ang thlaang he duuemsakna hamla Amah teng la law ham a khue.
- C. Duemna tihe tah thahoeng ruila bibina oen aana-awl nawhatah bawkna phuung huiah ka awm nawhatah bibina nawhatah bibihutna pakhat khat dawng kalawng loeihdemsakna bueng muehla aka soep ngaimawngna oen aka betoet ngaikhuekna tekhawseh thuinuet la awm.
- D. Bawipa kah hawphuih te phuihna tihe tah Pa kah a kawngaihna n'khuenna te ni. Hetah aana-awl nawhatah bawkna phuung kah thaihu pakhat khat rangoen a ri a mawng khuehna nawhatah tungepna nawhatah bibina pakhat khat rangoen tamna la awmsakna mueh la, Pa kawngaihna rangoen khaangthil khoep la awm.
- E. Bawipa tah teang hingna oenah hing tih, Pa kawngaihna coeng kalawng atloe meang thaihu khawseh khuituuk nawh. Bawipa lawng amah oen mah te Pa kawngaihna dawngah a pumboeih la dawk a lawh (Math 26:39, 42). Te dawngah, Bawipa lawng mami tengah Amah tengla cang hamla awl avan thui.
 - 1. Oengcathli lawng Bawipa kah hawphuih la ka awm Pathen kawngaihna te phuihna rangoen amami kah muithla khuiah Bawipa te a oet u tih, Bawipa kah daankoei ningla Pathen kamthlana ham thahoeng ruila bi a bi u – 11:29a. 1Pet 2:21.
 - 2. A hing khuipuer ah Pa tengla dawklawhna oen awl-ngaina aka khueh Bawipa lawng mami tengah dawklawhna oen awl ngaina aka khueh Amah kah ahingna te m'peek poen – Filip 2:5-11. Heb 5:7-9.
 - 3. Khrih tah lamha cuek Pathen-thlaang la awm tih, mami tah Pathen-thlaangthli zahawh la n'awm u. Mami lawng Pathen tengla Bawipa kah a pumboeih dawklawhna oen Pathen te Bawipa kah a boetna toe a ngaikhueknathli te Bawipa teng kalawng n'cang u ham ni.
 - 4. Pathen lawng Bawipa Jesu teng kalawngah patoeng mami khuiah bi a bi, hetah Bawipa haaiah ngaih-khueksakna ham a theenna tah mami lawng Bawipa kawngaihna te n'saithaina hamla ni (13:20-21). Pathen lawng Amah kah aka theen a ngaikhuekna hamla, a ngaihna hamkhaw, bibina hamkhaw mami khuiah tlaihawngna bibi a bi (Filip 2:13).
- F. Kawdawna nawhatah neemna tihe tah tukna te thung koep nawhna te athuingaihna tih, dungvoengna tihe tah mah oen mah m'pawmsaang nawhna te a thuingaihna. Tukna boeihboeih te a tawng khui roek veng Bawipa tah a kawdaw tih, hooetna boeihboeih te a ueh roek vengah Bawipa tah a thinkaw khuiah dungvoeng la awm.
- G. Bawipa lawng Pa kawngaihna dawngah Amah oen mah a pumboeih la dawk a lawh tih, Amah ham khatkhat sai ngaihna nawhatah Amah ham pakhatkhat dang hamla mengtengna khueh nawh. Tedawngah meang paihuen dawng khawseh Bawipa lawng thinkaw khuiah duemna a khueh. Bawipa lawng Pa kawngaihna te a pumboeih ngaikhuekna a khueh.
- H. Bawipa kah hawphuih te phuihna rangoen khawseh, Amah teng kalawng cangna rangoen khawseh mami lawng n'dang u duemna tah mami kah lungbuithli ham la ni. Tetah khuiben duemna la awm. Tetah coengna dawngah dauben mailai la ka awm thaihu nawh ni.

- I. Mami lawng Bawipa kah daankoei ningla Amah tengah n'cang u, mami kah pumsa hingna rangoen muehla thawhkoepna dawng mami kah hingna la ka awm Amah rangoen n'cangna te ni – Efesa 4:20-21. 1Pet 2:21.
- J. Bawipa kah hawphuih tah Pa kah a kawngaihna la awm tih, Bawipa kah thalrit tetah Pa kawngaih saina bibi te ni. Teang thalrit tetah a phueih nep tih khaaruet nawh, zaang tih aritna awm nawh.
- K. Aphueih nep ti Kriik awllung he “hawna hamla thuem” tila thuingaihna awm. Te dawngah theenna, n'lung na thaina, a phueih nepna, ngaih ham koei aka theen tila a thuingaih nani – niingna, arai khitna, thlaang reen nawhna, khaaruet nathli oen thunkha u.
- L. Mami lawng Bawipa kah hawphuih (Pa kawngaih) te n'phueih coengah Bawipa tengla n'cang kawinih, mami kah thinkawthli lawng duemna a khueh ai. Pathen kah a kamthlanna oen aka tuhkai hawphuih tah hetila awm. Pathen kamthlahna dawngah thaihu soeprep boeih tah thalrit la awm nawh, tetah awmngaihna ni.

II. Pathen a awmna huen sakna oen tuhkai la aka santhlang awl uupna te coengah, Exod 31:12-17 dawngah Sabbath khawhin te khoemdoen ham awlpeekna te koep koep avan thui. Kolose 2:16-17 angla, Khrih tah Sabbath hin duemna kah a soengna la awm. Bawipa tah mami kah soepbirna, duemna, roepna oen a pumboeih ngaikhuekna la awm – Heb 4:7-9. Isai 30:15a.

- A. Himbaai im sakna bibi hamla awlpeekna a awm coeng ah Sabbath hin oen tuhkai la a thuina hetah Bawipa lawng im aka sakungthli oen bibi aka bikungthli lawng Bawipa ham bi a bi u vengah Bawipa oenah haih metila a duem naai tite a cang u ham la awm tite avan thuinuet.
- B. Mami lawng Bawipa hamla metila m'bi u ai ti bueng te n'ming u tih, Bawipa oen metila n'duueu u naai tite n'ming u nawh kawinih, Pathen ben kah akungmawng tlapna oen aka thunkha u bibina la ni a awm khueng ai.
 - 1. Pathen tah hinsarihna khawhin vengah te duem, tu dawngah tikawinih Bawipa lawng a bibina a coeng tih a kaw a tluepsak poen dawng ni. Pathen bawilen na lawng a tuengna awm, metihtiah thlanghing khuiah Bawipa kah a muisam awm tih, raalpa Seitan naamna (taana) ham Bawipa kah aana-khuehna te thuekdakna ava awm ham poen dawng ni. Thlaang lawng Pathen a tuengsak tih Pathen kah a raalpa oen hoeitlang la a awm khuipuer vengah, Pathen tah a ngaikhuekna oenah te duem – Gens 1:26, 31-2:2.
 - 2. A huben latah a hinsarihna khawhin he Sabbath hin tila a poekkhuep u (Exo 20:8-11). Pathen kah khawhin hinsarihna hetah thlaang hamla lamha cuek khawhin la awm.
 - 3. Pathen lawng thlaang kah a awmngaihna hamla thaihu soeprep boeih te oepsoeh la a roek a ba. Thlaang lawng suen la a awm coeng kalawng ah, Pathen kah bibina dawngah bawngzawng haih la awm nawh. Ahih tah Pathen kah a duemna khuiah va kuun.
 - 4. Thlaang he lamha cuek la bibina ham suen la awm nawh tih, Pathen oenah haih ngaikhuek ham oen a duem ham ni suen la a awm. Sabbath hin hetah thlaang hamla sai pe la awm tih, thlaang he Sabbath hin hamla nawh ni – Mark 2:27.
- C. Exod 31:17 lawng “Metihtiah Jehova lawng vaandawng oen diklai he khaw hinruk khui puer a suen coeng ah a hinsarihna dawng atah duem tih, tha a lawh” tila a thui.
 - 1. Sabbath khawhin hetah Pathen a duemna bueng mueh la Bawipa hamla thalawhna la khaw awm.
 - 2. Pathen tah Amah kah suenna bibi te aboeih coeng ah duem. Bawipa lawng a thaihu saithli sawah, vaan-dawngthli, diklai oen aka hing aka tatvuet thaihuthli boeih, awlpui la thlaang te a bueh tih “broe nawh theen” tila a thui – Gens 1:31.
 - 3. Pathen lawng thlaang oenah haih tha a lawh. Pathen lawng thlaang he Amah muisam dawngah muithla oenah haih suen la awm, teah ni thlaang lawng Bawipa oenah haih a pawlneng thai ai. Te dawngah thlaang he Pathen kah thalawhna la awm – athan 26, 2:7. Thuinuet John 4:31-34.
 - 4. Pathen tah thlaang cadiil he suen la a awm thlan vengah “cadawng thlaanghoeng” la awm (thuinuet Gens 2:18-22). Thlaang he Bawipa kah a zu la awm sakna hamla Bawipa te a dou ham, a lungna ham, Bawipa oen saangthil la awm ham oen Bawipa te tuengsak hamla angaihna a khueh (2Kor 11:2. Efesa 5:25). Aka law ham dungzaan tue vengah Pathen tengah a zu, Jerusalem khawpui thai awm vetih tete Tuuca kah a zu tila a khue (Awlp 21:9-10).

5. Thlaanghing he Pathen te tuihalhna aka dipsak, a ngai aka khueksak, tha alawhna ham aawk hamkoei angla awm. Pathen lawng Amah kah a bibi te a boetsak coeng kalawng a duempek vengah, thlaang tah Bawipa kah a puipaw la Bawipa khuiah awm.
 6. Pathen hamla tah hinsarihna khawhin tihe duemna oen thaalawhna khawhin la awm. Tede, Pathen kah a puipaw la ka awm thlaang hamla tah duemna oen thalawhna khawhin he lamha cuek khawhin la awm. Thlaang hamla lamha cuek khawhin he awmngaihna khawhin ni.
- D. Mami khuiah awmngaihna a awm thlan toe ah Pathen lawng mami te bibi n'saisak nawhna hetah Pathen ben kah a kungmawng pakhat la awm. Bawipa oenah haih, Bawipa te a pumboeih la n'awmngaih u coeng kalawng, mami lawng Bawipa oen thikat la bi m'bi u thai poen.
1. Mami lawng Pathen oenah haih metila ka awmngaih naai, Pathen Amah roeroe te metila ka awm ngaihna ai, Pathen oen metila saangthil la ka awm ai tite n'ming u nawh kawinih, Bawipa oen metila bi m'bi haih vetih, Amah kah Pathen ben bibina dawngah Amah oen metila pumkhat sakhat la n'awmna ai tite m'ming u nawh mue. Pathen lawng amah kah bibina dawngah boeih tangte poen la aka awm thaihu te thlaang lawng a awmngaihna la awm.
 2. Penticos hin vengah hubangthli tah Muithla oen saangthil la awm u, helawng ahimi tah Bawipa kah a awmngaihna oenah saangthil la awm u tite a thuingaih na. Ahimi tah Muithla oenah saang thilla a awm u dawngah, thlaangtloethli lawng ahimi he misurtui oenah ruui u tila a poek u – Celt 2:4, 12-13.
 3. Atangtang atah, ahimi tah vaandawng ben misur tui kah awmngaihna oen a bee u na ni. Ahimi lawng he awmngaihna rangoen saangthil la a awm u vengah ni Bawipa oen pumkhat sakhat coengna dawngah Pathen oenah bibina haih hamla kung a tawng u. Penticos poei khawhin he apareetna a zar kah lamha cuek khawhin la awm. Te dawngah, Penticos poei khawhin oen tuhkai la lamha cuek khawhin kah a cuek a kungmawng te mami lawng n'huh u.
 4. Tetah Pathen hamla bibi saina oen duemna a kawng-lam la awm de, thlaang ham tah duemna oen bibina a kawnglam la awm.
- E. Himbaai im sakna hamla bibina rangoen thuinuet la ka awm thlangboel sakna hamla Pathen kah Pathen ben bibina dawngah mami lawng Pathen thlaangthli la n'awm una oen Bawipa Amah te n'ngoe u tite avan thuinuetna noekna te n'khuen u ham ni. Teveng ah mami lawng Pathen oenah haih pumkhatsakhat la awmna rang oen Pathen ham bueng muehla Pathen oen bibi haih thaina khaw n'khueh u poen ai. Bawipa tah bibina hamla mami kah tha awmna oen thahuer bibina ham mami kah tharaana la awm poen ai.
1. Mami tah Pathen thlaangthli la ng'awm u tih, mami kah awmngaihna, tha awmna, tharaa oen thaihu soeprep la awm hamla mami lawng Bawipa n'ngoe una kah noekna te n'cehpui u ham ni. Teah ni mami lawng Bawipa ng'hinzah ham oen bawilen tuengsak hamla Bawipa ham bi m'bi u thai ai.
 2. Sabbath hin tihe tah mami lawng Pathen hamla n'bisai u thlan vengah, Pathen te n'awmngaih u tih, Amah oen saangthil la awm ham n'ngoe u tite a thuingaih na ni. Peter lawng khuiben ah saang pe la ka awm Pathen, khuiben saangthil la ka awm Muithla rang oen awlthangtheen te a phawng. Tedawngah Peter khuiah ahih tah Pathen kah bibi pueihaih la awmna oen ahih kah awlthangtheen phawngna he Pathen hamla hinzah koehna oen bawilenna la aka awm noekna pakhat la va awm – athan 14.
 3. Pathen thlaangthli la, mami lawng Pathen oen haih duemna, Pathen te n'awmngaihna oen Pathen oenah lamha cuek saangthil la ka awm noekna te n'khuen coengah, mami tengah saangthil la ka awm hekah Bawi oenah haih bi m'bi u ham ni. Te bueng muehla mami lawng Pathen oen haih bibina bueng mueh la Pathen oen pumkhat sakhat la aka awmthli lakhaw bibi m'bi u.
 4. Pathen thlaangthli tengah mami lawng n'phawng u vengah, mami kah Bawipa tah mami kah thaawmna, mami kah tharaa oen awlciim te bibina hamla mami kah thaihu soeprep la aawmna kah noekna te khuen ham tha n'huer u poepa ham ni – 2Kor 13:3. Cel 6:4.
- F. Sabbath hin te n'khoemdoenna tah dungzaan kawtluepna nawhatah awlkhuehna la awm tih, tetah mami lawng Bawipa te lamha cuek la n'awmngaihna oen Amah oen saangthil la n'awmna rangoen khaw, te coengah Amah hamla, Amah oenah haih, Amah oen pumkhat coengna dawng bibina rangoen khaw Amah oen pumkhat sakhat la ng'awm una ham kawng dawngah Pathen te aa-mah n'khanna la awm – Exo 31:16.

1. Amah te khuiben la n'dangna oen Amah te n'caak aawkna rangoen awmngaihna awm mueh la Bawipa hamla m'mah rangoen bibina he lakueng ham koei a kawnglam pakhat ni – 1Kor 12:13. John 6:57.
 2. Peter lawng Penticost hin ah awl a phawng lii veng, tetah Jesu te khuiben ningla thumhaihna, Bawipa te a caak a aawkna ni.
- G. Sabbath hin tah ciimcaihna kah a kawnglam lakhaw awm (Exo 31:13). Mami lawng Bawipa te n'awmngaih u tih Bawipa oenah haih, Bawipa ham oen Bawipa oen pum-khat la n'awmna rangoen bi m'bi u vengah, alolo la n'ciimcaih u tih, aka pawci thaihu boeih dawng kalawng Pathen tengla athloekca la hooep la n'awmna oen thisa la pumsa la n'awmna thaihu boeih boeih zuengtheeng hamla Pathen oen roeinengna n'khueh u.
- H. Thlangboel hingna dawngah mami lawng Bawipa te lamha cuek la n'awmngaih a awm mueh la, Amah oen pumkhat la n'awmna rangoen Bawipa te tuihzoeih bi m'bi u mueh la thaihu zahawhthlang n'sai u maithai. Te ang tuihzoeih bibina lawng muithla ben duekna oen Takpum dawngah pawlnengna a awm tlaih nawhnathli heang thaitakthli te a thoengsak – athan 14-15.
- I. Pathen a awmna a huen oen aka tukhai thaihu soeprep lawng mami te akawnglam pakhat tengla n'cehpui u – tetah Sabbath hin oenah haih Sabbath hin kah duemna oen Bawipa kah tha a lawhna a kawnglam ni. Thlangboel hingna dawngah mami tah himbaai im dawng n'awm u tih, himbaai im lawng mami te duemna, Pathen kah a poek oepsoehna oen Amah lawng a sai poen thaihuthli te n'awmngaihna benla te n'cehpui.
- J. Himbaai im oen te lawng a hawpaina thaihu boeih te a sakna bibi (thlangboel sakna hamla Bawipa kah bibina rangoen a thuingaihna) lawng Pathen te awmngaih huhtawngna oenah bibi a tawng hamla awm tih, Pathen te awmngaih huhtawngna rangoen laklaw kah a tuetang thli khuiah tha a lawhna oenah haih haaila poe a ceh ham ni. Hetah mami lawng m'mah kah thaawmna rangoen Pathen ham bibina mueh la, Amah te n'awmngaihna oen Amah oen pumkhat la n'awmna rangoen bibina ni tite avan thuinuet ai. Hetah mami kah muithla khuiah khui ben kah duemna la aka awm Khrih oenah haih Sabbath hin kah akungmawng ruihimna te khoemdoen nani.